



MAJLIS PERBANDARAN SEBERANG PERAI

TEKS UCAPAN

**YBHG. DATO' Sr HAJI ROZALI HAJI MOHAMUD
YANG DIPERTUA MPSP**

SEMPENA

**MAJLIS PELANCARAN SISA SIFAR
TAMAN DESA OREN, SUNGAI PUYU
BUTTERWORTH**

03 DISEMBER 2017 (AHAD)

10.15 PAGI

**TAMAN DESA OREN
SUNGAI PUYU
BUTTERWORTH**

Disediakan oleh Jabatan Korporat dan Perhubungan Antarabangsa

Terima kasih Saudara/Saudari Pengacara Majlis

Yang Berhormat Tuan Phee Boon Pooh

Ahli Majlis Mesyuarat Kerajaan Negeri Pulau Pinang
Merangkap Pengerusi Jawatankuasa Kebajikan, Masyarakat Penyayang
dan Alam Sekitar

Yang Dihormati Ahli Majlis-Ahli Majlis

Majlis Perbandaran Seberang Perai

Yang Berusaha Puan Ir Hj Rosnani bt Hj Mahmud

Setiausaha Perbandaran
Majlis Perbandaran Seberang Perai

Yang Berusaha Encik Phee Boon Chee

Pengerusi
Perbadanan Pengurusan Taman Desa Oren

Ketua-Ketua Jabatan dan Pegawai

Majlis Perbandaran Seberang Perai

Penghuni-Penghuni Taman Desa Oren

Rakan-Rakan Media

Tuan-Tuan Dan Puan-Puan Yang Dihormati Sekalian

Assalamualaikum warahmatullahi wabarakatuh,

Selamat pagi dan salam sejahtera,

Alhamdulillah, bersyukur kehadiran Allah S.W.T. kerana dengan izin dan limpah kurnianya dapat kita bersama-sama hadir dalam Majlis Pelancaran Sisa Sifar Taman Desa Oren pada pagi yang mulia ini.

Sebelum itu izinkan saya merakamkan ucapan terima kasih kepada Yang Berhormat Tuan Phee Boon Poh, Ahli Majlis Mesyuarat Kerajaan Negeri Pulau Pinang Merangkap Pengerusi Jawatankuasa Kebajikan, Masyarakat Penyayang dan Alam Sekitar kerana sudi meluangkan masa hadir ke majlis ini.

Para Hadirin yang dihormati sekalian,

Konsep Sisa Sifar adalah merupakan satu matlamat yang kukuh dan berwawasan untuk mengajak manusia mencontohi kitaran alam semulajadi di mana semua bahan buangan adalah sumber untuk kegunaan lain. Ianya merupakan satu elemen yang penting di mana pembuangan sisa buangan / sampah ke alam semulajadi atau tapak pelupusan sampah dapat dikurangkan.

Secara mudah konsep ini mengajak kita supaya memaksimumkan kitar semula, meminimakan sisa lebihan, mengurangkan penggunaan dan memastikan setiap barangan yang dihasilkan boleh diguna semula, dibaiki, dikitar dan dikomposkan.

Untuk makluman tuan-tuan dan puan-puan sekalian, pada tahun 2016, MPSP telah membelanjakan RM8,766,971.90 untuk menguruskan 434,008.51 tan sampah di Tapak Pelupusan Pulau Burung. Kos ini hanya merupakan kos *tipping fees* di Pulau Burung dan tidak termasuk gaji, kos minyak dan penyelenggaraan kenderaan.

Pengurangan sampah ke Pulau Burung bukan sahaja dapat memanjangkan jangka hayat tapak pelupusan sampah tersebut, namun ia juga dapat mengurangkan kos pembayaran *tipping fees* yang dikeluarkan oleh MPSP. Jika lebih banyak kos dapat diijmatkan, wang tersebut dapat disalurkan untuk membangunkan dan mengindahkan lagi kawasan Seberang Perai.

Lebih daripada 41% sampah yang dibuang oleh penduduk Seberang Perai merupakan sisa organik. Jika kita dapat menjalankan kitar semula dan pengkomposan, ia dapat mengurangkan banyak sampah yang dihantar ke tapak pelupusan. Oleh itu, kerjasama di antara komuniti seperti di Taman Desa Oren dengan MPSP dalam program-

program seperti ini amat dialu-alukan kerana ia memupuk satu ikatan ke arah mewujudkan betapa pentingnya kita mengurangkan penjanaaan sisa pepejal atau sampah sarap.

Untuk makluman tuan-tuan dan puan-puan sekalian, pada tahun 2016, kadar kitar semula bagi keseluruhan Seberang Perai adalah 42% yang mana ianya telah berjaya ditingkatkan daripada 39% pada tahun 2015. Bagi mencapai hasrat MPSP untuk mencapai Bandar Rendah Karbon yang diimpikan pada tahun 2022, kadar kitar semula perlu dipertingkatkan dari 42% pada tahun 2016 ke 70%. Selain itu, beratan sampah ke tapak pelupusan sampah perlu dikurangkan sehingga 50%. Angka-angka ini merupakan satu sasaran yang tinggi dan hanya boleh dicapai sekiranya MPSP dan penduduk Seberang Perai bersama-sama berganding bahu mencapai matlamat ini. Di antara langkah-langkah perancangan MPSP adalah:-

- i. Meningkatkan penyertaan kilang, sekolah dan komuniti dalam program kitar semula.
- ii. Menggalakkan aktiviti kitar semula kepada Agensi-agensi Kerajaan di Seberang Perai.
- iii. Mewujudkan pusat-pusat kompos.

- iv. Mewujudkan bank data pemungut barangan kitar semula pada 1 April 2018.

Para Hadirin yang dihormati sekalian,

Kerajaan Negeri Pulau Pinang pada 1 Jun 2016 telah menguatkuasakan Undang-Undang Kecil Pengasingan Sampah Dan Pelesenan Perkhidmatan Pemungutan Sampah Yang Boleh Dikitar Semula (Majlis Perbandaran Seberang Perai) 2016. Penguatkuasaan dasar ini bermula pada 1 September 2017 dan ditumpukan kepada kawasan pembangunan strata terlebih dahulu. Kegagalan menyediakan tempat tong pengasingan sampah akan dikenakan kompaun sebanyak RM250 bagi setiap kesalahan yang dilakukan. Kaedah yang digunakan adalah yang paling mudah dilaksanakan iaitu pengasingan sisa kepada dua (2) iaitu sampah yang boleh dikitar semula di dalam kemudahan pengurusan sampah yang boleh dikitar semula dan sampah baki ke dalam bekas sampah komunal yang disediakan.

Bahagian III Undang-Undang Kecil ini menggariskan fungsi Badan Pengurusan Bersama untuk memberitahu pemunya atau penghuni tentang Undang-Undang Kecil ini dan memastikan pemunya atau penghuni menguruskan sampah yang boleh dikitar semula mengikut

cara yang ditetapkan oleh MPSP. Kewajipan Badan Pengurusan Bersama hendaklah menyediakan bekas sampah komunal yang mencukupi dan kemudahan pengurusan sampah yang boleh dikitar semula pada setiap masa supaya sentiasa berada dalam keadaan bersih dan selamat. Bagi bekas sampah yang rosak, ianya perlu dibaiki atau digantikan dengan segera.

MPSP juga telah mengambil langkah-langkah untuk menggalakkan kawasan kediaman bertingkat / strata melancarkan Program Pengasingan Sisa Di Punca seperti berikut :

- i. Pengedaran risalah berkaitan Dasar Pengasingan Sisa Di Punca kepada JMB / MC di seluruh Seberang Perai.
- ii. Memberi taklimat berkaitan Dasar Pengasingan Sisa Di Punca kepada JMB / MC di seluruh Seberang Perai sejak dasar ini diperkenalkan pada 1 Jun 2016.
- iii. Pemberian notis kepada JMB / MC yang tidak menjalankan pengasingan sisa di punca semasa pemeriksaan pematuhan dibuat.

iv. Tindakan kompaun kepada JMB / MC yang tidak menjalankan pengasingan sisa di punca bermula 1 September 2017.

Berdasarkan rekod dalam Sistem COB (*Commissioner of Building* atau Pesuruhjaya Bangunan MPSP) sehingga Oktober 2017, terdapat 292 *Joint Management Body* (JMB) / *Management Corporation* (MC) yang telah ditubuhkan. Sehingga kini, hanya 49.6% JMB / MC yang telah melaksanakan arahan yang ditetapkan dalam UUK tersebut. Dari Julai hingga Oktober 2017, sebanyak 156 Notis telah dikeluarkan oleh MPSP kepada JMB / MC kerana tidak mematuhi arahan yang ditetapkan dalam Undang-undang Kecil Pengasingan Sampah dan Pelesenan Perkhidmatan Pemungutan Sampah Yang Boleh Dikitar Semula (Majlis Perbandaran Seberang Perai) 2016. Ini disusuli dengan 25 kompaun yang dikenakan ke atas JMB / MC yang terus gagal mematuhi arahan ini.

Saya dimaklumkan bahawa Taman Desa Oren masih belum dilawat periksa untuk dasar pengasingan sisa di punca. Semua JMB / MC di kawasan pembangunan strata akan dilawat periksa oleh MPSP dari masa ke semasa bagi memastikan JMB / MC patuh dengan dasar yang telah diperkenalkan oleh Kerajaan Negeri ke arah menjadikan Bandar Rendah Karbon menjelang 2022 melalui pengurangan sampah.

Para Hadirin yang dihormati sekalian,

MPSP telah memulakan kempen Program Sisa Sifar pada tahun 2010. Sasaran bagi program ini adalah sekolah-sekolah, kilang-kilang dan komuniti. Untuk menjayakan lagi kempen Program Sisa Sifar ini, MPSP memperkenalkan *MPSP Smart Consumption Model* (Model MPSP berhubung Penggunaan Bijak) atau Amalan 8R dalam usaha untuk menggalakkan dan melahirkan sebuah masyarakat dan komuniti setempat yang sihat dan peka terhadap isu-isu alam sekitar serta diseimbangkan dengan perkembangan ekonomi dan pembangunan sosial.

8R adalah konsep yang diamalkan oleh MPSP dalam memastikan kelestarian alam sekitar. Amalan 8R mengajak masyarakat berfikir terlebih dahulu sebelum menghasilkan sampah. Ini adalah selaras dengan hasrat kerajaan untuk menjadikan Pulau Pinang *Cleaner, Greener, Safer and Healthier* (Pulau Pinang Lebih Bersih, Hijau, Selamat dan Sihat) dan menjadi salah satu usaha MPSP untuk mencapai impian menjadikan Seberang Perai sebagai sebuah bandar raya rendah karbon menjelang tahun 2022. 8R memainkan peranan yang besar dalam menuju sisa sifar dan secara ringkasnya:-

1. *Rethink (Be mindful of your consumption, your relationship with 'things' and your relationship with the Earth).* Ianya mengajar kita membuat pembelian secara berhemah atau mengambil sekadar keperluan. Ini dapat mengelakkan pembaziran dari sisa tersebut berakhir di tapak pelupusan.

2. *Refuse (Don't consume what you don't need to)* - kita sentiasa mempunyai pilihan. Jangan beli apa-apa yang tidak diperlukan. Sebagai contoh menolak penggunaan plastik kerana plastik merupakan sumber terbesar pencemaran alam.

3. *Reduce (Reduce consumption of energy and materials)* - bertujuan mengurangkan jumlah sampah yang dihasilkan untuk dihantar ke tapak pelupusan sampah. Sebagai contoh: pengurangan penggunaan barangan pakai buang seperti peralatan makan dan minum (*disposable utensils*); membeli produk yang tidak mempunyai pembungkusan yang terlalu banyak; dan memulakan kompos sampah.

4. *Re-use (Share with others. Find new uses for old objects)* - merupakan langkah mudah dalam mengurangkan sisa. Contoh harian yang dapat kita lihat adalah mengamalkan

penggunaan *reusable bag* ketika membeli-belah. Beg plastik bukan sahaja akan berakhir di tapak pelupusan, sebaliknya ia juga mungkin akan berakhir di dalam parit atau longkang yang bilamana tersumbat boleh menyebabkan banjir kilat.

5. *Repair (Fix or upgrade your objects rather than throwing them away)* - tidak terus membuang barang-barangan yang rosak. Sebilangan barangan yang rosak boleh dibaiki dan digunakan semula.
6. *Re-gift (Share, and be a part of the gift company)* - barangan yang masih boleh digunakan dihadiahkan atau disumbangkan kepada pihak yang memerlukan.
7. *Recover (Energy and materials recovery)* - merupakan rawatan bahan buangan untuk menjana tenaga. Tenaga yang dihasilkan oleh kaedah khas dan digunakan sebagai kuasa / tenaga.
8. *Recycle (Close the loop and remake)* - merupakan cara dan kaedah dalam menjalankan kitar semula barang-barangan yang dibuang. Selain itu, mempraktikkan seni *upcycle*, barangan terbuang untuk dijadikan suatu barangan baharu,

yang berkualiti, bernilai dan boleh digunakan. Malah, ianya boleh dijadikan sebagai punca sumber pendapatan yang lumayan.

Saya amat yakin sekiranya Konsep 8R yang saya sebutkan tadi diamalkan sepenuhnya, matlamat menuju sisa sifar dapat dicapai dengan jayanya dan menjadi satu tunjang utama dalam penjagaan alam sekitar yang lebih lestari dan hijau

Para Hadirin yang dihormati sekalian,

Bagi makluman semua, Taman Desa Oren merupakan *gated community* yang mempunyai 149 unit rumah dan sehingga kini 54 daripadanya telah didiami. Terima kasih kepada Perbadanan Pengurusan Taman Desa Oren kerana sudi mengambil bahagian dalam Program Sisa Sifar bersama MPSP. Keterbukaan pihak Perbadanan Pengurusan Taman Desa Oren dalam menerima MPSP untuk menjalankan Program Sisa Sifar merupakan satu langkah permulaan yang penting untuk membentuk sebuah komuniti yang lestari.

Sempena dengan hari pelancaran ini, penghuni-penghuni Taman Desa Oren akan dibekalkan sebuah bekas 5 liter untuk setiap rumah untuk mengisi sisa organik dan minyak masak terpakai. Para penghuni

dinasihatkan agar tidak memasukkan beg plastik dan cecair dalam tong tersebut. Bagi makluman, sasaran ditetapkan adalah terbahagi kepada tiga perkara iaitu:

1. Bahan-bahan pepejal yang tidak boleh dikitar semula dibuang sebagai sampah.
2. Bahan-bahan pepejal yang boleh dikitar semula.
3. Sisa organik pula akan dikumpulkan untuk tujuan dikompos.

Bagi sisa organik, ianya akan dikutip oleh Pusat Sumber Alam Sekitar Bagan Lalang untuk pengkomposan manakala barang yang boleh dikitar semula dan minyak masak terpakai akan diuruskan oleh pihak Perbadanan Pengurusan Taman Desa Oren. Jika program ini berjaya, dianggarkan sekurang-kurangnya 80% sisa pepejal dari Taman Desa Oren dapat dikurangkan dari dihantar ke tapak pelupusan.

Selain pengasingan sisa di punca, Kempen Makan Sampai Habis amatlah bersesuaian bagi mengurangkan pembaziran. Di sini saya ingin menyeru para penduduk Taman Desa Oren untuk berfikir dahulu sebelum membeli atau menyediakan makanan dalam usaha

mengurangkan penghasilan sisa organik. Ini hendaklah hendaklah diaplikasikan sebagai budaya harian kita untuk menjayakan Sisa Sifar.

Saya juga menyeru kepada para hadirin sekalian, termasuk diri saya sendiri untuk bekerjasama mengurangkan kepanasan global dengan mengkompos sisa organik atau menjana biogas dan mengurangkan penghasilan sisa organik yang boleh menjana gas metana.

Dengan mengamalkan Konsep Sisa Sifar dan Makan Sampai Habis ini, kita bukan sahaja membantu memelihara alam sekitar malah memperolehi manfaat dalam bentuk penjimatan kos operasi atau harian. Walaupun kita tidak dapat memberikan sumbangan yang besar kepada bumi kita namun dengan mengamalkan perkara di atas sebenarnya merupakan titik tolak untuk mengekang pelbagai permasalahan yang bakal timbul kesan daripada tabiat pembaziran yang dilakukan.

Para Hadirin Yang Dihormati Sekalian,

Saya seterusnya menyeru para hadirin sekalian untuk menjadikan sisa sifar sebagai satu amalan dalam budaya hidup seharian, agar bumi yang kita pinjam dari generasi akan datang ini, dapat dikembalikan kepada mereka seindah dan se hijau mungkin. Diharapkan dengan

program sisa sifar ini, ianya dapat merealisasikan motto Negeri Pulau Pinang dalam menjadikan Pulau Pinang sebagai "*Cleaner, Greener, Safer and Healthier Penang*".

Sekian,

Wabillahi Taufik Wal Hidayah, Wassalamualaikum Warahmatullahi

Wabarakatuh.

Terima kasih.